

# Լեռնային Ղարաբաղի հակամարտության կարգավորման բանակցությունների բացերը

## Համառոտագիր



Մարդկային  
գարգացման  
միջազգային  
կենտրոն

### «Եթե ուզում ես, որ սլաքդ դիպչի ծառի կատարին, նետդ լուսնին արձակիր»

Ո՞րն է հայկական կողմի օրակարգը բանակցությունների արդյունքում Արցախի ժողովրդի ապագայի վերաբերյալ: Եվ որ ավելի կարևոր է, ո՞րն է Արցախի ժողովրդի պատկերացումը սեփական ապագայի վերաբերյալ: Նախ և առաջ հարկ է հստակ ընկալել ու ներկայացնել, որ նվազագույնը, ինչն ունի ու ցանկանում է պահպանել արցախցին, իր ու ընտանիքի ֆիզիկական անվտանգության նվազագույն ընդունելի երաշխիքն է՝ հակամարտության փխրուն, սակայն պատերազմի օրերում հավասարակշռություն ապահովող միակ հուսալի գործոնը. սահմանին կանգնած իր զավակը՝ հայ զինվորը: Ցավոք սա չենք կարողանում պատշաճ ներկայացնել ադրբեջանական հասարակությանը, միջնորդներին, աշխարհին: Ասենք հայաստանցիներն էլ, ընդհանուր առմամբ, լավ չեն պատկերացում արցախցու մտահոգություններն ու շահերը: Արդյունքում, թույլատրելի նվազագույնն աշխարհին ու ինքներս մեզ ներկայանում է որպես առավելագույն ձեռքբերում: Իսկ ինչպիսի՞ն է այն՝ մեր պատկերացումների առավելագույն ձեռքբերումը: Գուցե ԼՂՀ անդամակցությունը Եվրոպական Միությանը տեսանելի հեռանկարով: Ինչու՞ ոչ: Հին հնդկական ասացվածքն ասում է. «Եթե ուզում ես, որ սլաքդ դիպչի ծառի կատարին, նետդ լուսնին արձակիր»:

### Երբ շփոթում են անհրաժեշտ նվազագույնն ու առավելագույն հնարավորը

Դիվանագիտական պատերազմի ադրբեջանական գործելաճը տարեցտարի զուգահեռվում է սպառազինության մրցավազքի և հրադադարի պարբերական, ապա՝ շարունակական խախտումներով: Հարևան երկիրը զինվում է, միաժամանակ հնարավորինս թույլ պահելով բանակը. ավտորիտար երկրում բանակն առաջին հերթին ներքաղաքական գործոն է: Միաժամանակ, Ադրբեջանի իշխանությունը սեփական հասարակության մեջ սնել ու փայփայում է հակամարտության շուրջ լարվածությունը: Սա զարմանալի չէ: Հակամարտության շուրջ մշտական լարվածության պահպանումը Ադրբեջանում իշխանության պահպանելու կարևորագույն գործոն եղել և մնում է: Ադրբեջանի իշխանությունը փորձում է համոզել միջնորդներին, որ լարվածությունը թուլացնելու միակ հնարավորությունը Հայաստանից փոքր, սակայն շոշափելի զիջումներ պոկելն է: Ինչպե՞ս և ինչու՞:

Բանակցությունների տարբեր փուլերում Ադրբեջանն իր բոլոր քայլերը, անգամ բանակցություններին բուն մասնակցությունն ու ուժի չկիրառման մասին գործին չբռնող խոսքերը, ներկայացրել և ներկայացնում է որպես զիջում: Մինչդեռ հայկական կողմի գերկառուցողական գործելաճը տպավորություն է թողնում, որ բանակցային գործընթացում Հայաստանը ոչ թե սեփական շահերին հետամուտ հակամարտության կողմ է, այլ անկողմնակալ ու պատրաստակամ միջնորդ: Թվում է, թե հայկական կողմը հասել է իր շահերը բավարարելու համար անհրաժեշտ առավելագույն ձեռքբերումներին և փորձում է պահպանել դրանք: Միաժամանակ թյուր տպավորություն է ձևավորվում, թե ադրբեջանական կողմը չունի անգամ իր շահերի բավարարման համար անհրաժեշտ նվազագույնը: Ուստի բանակցային գործընթացն ընթանում է միակողմանի զիջումների անբնական ակնկալիքների, պահանջների ու ճնշումների տրամաբանությամբ: Ադրբեջանը փորձում է ապացուցել աշխարհին, որ հայկական կողմը բանակցությունների «տորթն» ամբողջապես իրենով է արել: Այս գործում ինքներս էլ հաճախ նպաստում ենք ադրբեջանական քարոզչությանը: Սակայն, արդյո՞ք ներկա իրավիճակը հակամարտության կարգավորման արդյունքում Արցախի ապագայի մասին մեր պատկերացումների սահմանն է: Վստահաբար՝ ո՛չ: Իրականում հայկական կողմի ունեցածը մեր ցանկությունների փոքր «բլիթ» է, ինչը սակայն չենք կարողանում հավուր պատշաճի ներկայացնել աշխարհին ու հենց ինքներս մեզ: Թերևս պատճառն այն է, որ նվազագույնից կառչած դժվարանում ենք ուրվագծել մեր ձգտումների առավելագույնը:

Երևան 0001  
Սայաթ Նուվա 19  
Հեռ.՝ +374 10 582638  
Ֆաքս՝ +374 10 527082

mail@ichd.org  
www.ichd.org

Հասարակության կողմից բանակցային գործընթացի քայլերը պատշաճ կերպով ընկալվելու համար առկա անհրաժեշտ է, որ բանակցային ձեռքբերումների անհրաժեշտ նվազագույնն ու ցանկալի առավելագույնը տարբերեն և՛ կողմերը, և՛ միջնորդները: Միայն այս պարագայում հասարակությունները կգնահատեն և կողջունեն բանակցությունների սեղանին դրվող նախագծերն ու առաջարկները:

## **Անվտանգության խնդիրը՝ բանակցությունների լուսանցքում**

Բանակցությունների, դրանց ձևաչափի և միջնորդների գործունեության արդյունավետության ու գաղափարների ներկա ճգնաժամի ընկալման հիմքում բանակցությունների գործընթացում առկա սկզբունքային բացթողումներն են: Իսկ Մինսկի խմբի համանախագահների միջնորդային առաքելության գործընթացում առանցքային բացթողումն այն է, որ Արցախի ժողովրդի հիմնական մտահոգությունները կամ չեն արտացոլված կամ արծարծվում են մնացորդային սկզբունքով:

ԼՂՀ բնակիչների մտահոգություններն ու գերակայությունները բանակցային գործընթացում պատշաճ կերպով արտահայտելու համար միջնորդների հանդիպումները ԼՂՀ պաշտոնյաների հետ բնավ բավարար չեն: Իրականությունն այն է, որ ԼՂՀ-ն դուրս է մնացել բանակցային գործընթացից: Սակայն ամենացավալին այն է, որ բանակցային գործընթացի լուսանցքում են հայտնվել կարգավորման վերաբերյալ Արցախի ժողովրդի մտահոգություններն ու գերակա շահերը: Արցախցիների հետ բազմաթիվ քննարկումները փաստում են, որ ԼՂՀ բնակիչները գերակա շահ համարում են իրենց ընտանիքների անվտանգությունը: Արցախցիների բարձրաձայնած գերխնդիրը միջնորդների առաջարկներում ու նախաձեռնություններում կրում է ածանցյալ բնույթ, մինչդեռ բանակցությունների կիզակետում, թվում է, առավելապես Ադրբեյջանի և Հայաստանի բանակցային դիրքերում կարևորվող տարածքային և ԼՂՀ կարգավիճակին առնչվող խնդիրներն են:

Մինչդեռ ներկայում հակամարտության բոլոր կողմերի անվտանգության երաշխիքն ու ներկա փիթրուն հավասարակշռության կարևորագույն տարրն անվտանգության ձևավորված համակարգն է՝ իր տարածքային, ռազմական և այլ բաղադրիչներով: Այս հավասարակշռությունը խախտել առանց հակամարտող կողմերի համար ավելի նպաստավոր ու կենսունակ անվտանգության համակարգի ձևավորման անթույլատրելի է: Ձևավորված համակարգը հավասարակշռության հին վիճակից կարելի է դուրս բերել միայն ու միայն հավասարակշռության ավելի կայուն համակարգի ձևավորման պայմաններում: Ոչ թե ակնկալվող կամ խոստացված, այլ՝ գործող: Չէ՞ որ անվտանգության երաշխիքները միայն արցախցունը չեն: Դրանք հավասարապես ադրբեյջանցու ու հայաստանցու անվտանգության երաշխիքներն են: Չէ՞ որ հաճախ պաշտպանական առաջին գիծն անցնում է ադրբեյջանական բնակավայրերի ու հայկական շեների միջով: Եթե ռազմական գործողություններն ակտիվորեն վերսկսվեն, ապա հարյուր հազարավոր փախստականներ կարող են հեղեղել, ասենք, Բաքվի փողոցները՝ տարածաշրջանը կանգնեցնելով նոր հումանիտար ճգնաժամի առջև:

*Համառոտագիրը մշակվել է 2011թ-ի հունիսիս 16-ին կայացած՝ «Ռազմական զսպման քաղաքականությունից դեպի բանակցացություններ. դարաբաղյան հակամարտության կարգավորման գործընթացի բացերը» վերնագրով քննարկման մասնակիցների կողմից արտահայտված կարծիքների հիման վրա:*

*Կլոր սեղանին մասնակցում էին անկախ վերլուծաբաններ, պետական պաշտոնյաներ, միջազգային կառույցների ներկայացուցիչներ:*

*Քննարկումը կազմակերպվել էր «Սևծովյան տարածաշրջանի խաղաղաշինական ցանցի» աջակցությամբ:*

